



Broj: 02-05-2-2338/16
Goražde, 09.06.2016. godine

Na osnovu člana 22. Odluke o javnim priznanjima Općine Goražde ("Službene novine Općine Goražde", broj 4/16), Načelnik Općine Goražde, **r a s p i s u j e**:

J A V N I P O Z I V **za predlaganje kandidata za dodjelu javnih priznanja Općine Goražde**

Pozivaju se Načelnik i upravna tijela Općine Goražde, vijećnici Općinskog vijeća, preduzeća i druge pravne osobe, savjeti mjesnih zajednica, udruženja, vjerske zajednice i humanitarne organizacije da predlože kandidate (kolektive i pojedince) za dodjelu javnih priznanja Općine Goražde u formi:

1. Počasni građanin Općine Goražde

Uslovi: Javno priznanje „Počasni građanin Općine Goražde“ dodjeljuje se osobi posebno zaslužnoj za promicanje vrijednosti demokratskog društva, položaja i ugleda Općine Goražde, njegovih odnosa s drugim gradovima u zemlji i inostranstvu te za razvoj Općine Goražde ili pojedinih njegovih djelatnosti. Prijedlog za dodjelu javnog priznanja „Počasni građanin Općine Goražde“ mogu podnijeti Načelnik Općine Goražde, ili pet vijećnika Općinskog vijeća Goražde.

2. Zlatna plaketa Općine Goražde

Uslovi: Dodjeljuje se građanima Općine Goražde, njihovim udruženjima, drugim lokalnim zajednicama, ustanovama, preduzećima, vjerskim zajednicama te drugim pravnim osobama za iznimna dostignuća, akcije i doprinose u kontinuiranom dugogodišnjem radu i djelovanju kojima lično doprinose razvoju i boljitku Općine Goražde ili pojedinih njenih djelatnosti. Pod kontinuiranim dugogodišnjim radom smatra se period od najmanje pet godina.

3. Srebrna plaketa Općine Goražde

Uslovi: Dodjeljuje se za iznimna dostignuća, akcije i doprinose u oblasti privrednih, društvenih i javnih djelatnosti od posebnog općeg društvenog značaja za razvoj, ugled i promovisanje Općine Goražde, za protekli trogodišnji period pravnim i fizičkim osobama sa područja Općine Goražde.

4. Prijatelj/Prijateljica Goražda

Uslovi: Dodjeljuje se za građane koji nemaju prebivalište na području Općine Goražde za izuzetan doprinos u razvoju kulture, civilnog društva, sporta, turizma i drugih vrijednosti koje na najbolji način promovišu i afirmišu pozitivan imidž Općine Goražde u Evropi i svijetu za protekli dvogodišnji period.

5. Povelja za životno djelo Općine Goražde

Uslovi: Dodjeljuje se isktaknutim pojedincima koji su svojim kontinuiranim i izuzetno značajnim naučnim, stručnim, umjetničkim, pedagoškim ili drugim javnim radom dali trajan i primjeren doprinos lokalnoj zajednici, te ostvarili rezultate trajne vrijednosti na unapređenju stanja i razvitka pojedinih područja djelatnosti, odnosno, koji su dali trajan doprinos promociji i ugledu Općine Goražde.

6. Povelja humanosti Općine Goražde

Uslovi: Dodjeljuje se za humana djela učinjena na području Općine u prethodnih 12 mjeseci.

Općinska javna priznanja mogu se dodjeljivati posthumno.

U postupku predlaganja kandidata za javna priznanja Općine Goražde ne mogu se predlagati političke partije, kao ni organi i tijela istih.

KRITERIJI ZA DODJELU JAVNIH PRIZNANJA OPĆINE GORAŽDE SU:

a) PODRUČJE PRIVREDE

Pravne osobe iz područja privrede mogu se predložiti za dodjelu javnih priznanja ukoliko su u određenim periodima, ovisno o vrsti predloženog javnog priznanja, ostvarile dobre privredne rezultate u svom poslovanju, kako u pogledu finansijskih pokazatelja tako i u smislu značajnijeg investiranja ili zapošljavanja novih radnika, ili investiranja u pravcu zadržavanja postojećeg zapošljavanja i modernizacije proizvodnje, ili koje su ostvarile značajnije izvozne rezultate, te koje su osmišljavanjem novih proizvodno-tehnoloških postupaka, restrukturiranjem, ili novim proizvodom na tržištu ostvarile nove perspektive u razvoju privrednih djelatnosti na području Općine Goražde.

Pravne osobe iz područja privrede ne mogu se predložiti za dodjelu javnih priznanja ukoliko su u prethodnom razdoblju ovisno za koje se priznanje predlažu, poslovale s gubitkom, smanjivale broj zaposlenih, ili nisu izmirivale zakonske društvene obaveze, a posebno obaveze prema Općini Goražde. Prethodno utvrđeni kriteriji primjenjuju se i na prijedloge za dodjelu javnih priznanja čelnim osobama u pravnim licima u privredi (direktorima, predsjednicima i članovima Uprava, vlasnicima tvrtki u malom i srednjem preduzeću, obrtnicima i dr.).

b) PODRUČJE DRUŠTVENIH DJELATNOSTI

Pravne i fizičke osobe iz područja društvenih djelatnosti (kultura, umjetnost, prosvjeta, predškolski odgoj, sport, tehnička kultura, humanitarno-socijalne i zdravstvene djelatnosti, turističke djelatnosti, informisanje i dr.) mogu se predložiti za dodjelu javnog priznanja, ukoliko su u određenom razdoblju, ovisno o vrsti predloženog priznanja ostvarile iznimne rezultate u radu odnosno u djelatnostima kojima se bave, i time doprinijele ukupnoj promociji Općine Goražde.

Pravne osobe iz područja društvenih djelatnosti ne mogu se predložiti za dodjelu javnih priznanja ukoliko u prethodnom razdoblju, ovisno za koje se priznanje predlažu, nisu uredno dostavljale izvještaje o svom radu Načelniku i Općinskom vijeću, ili su dostavljeni izvještaji bili ocijenjeni manjkavima, ili ako u svom radu nisu namjenski trošili finansijska sredstva podrške od Općine Goražde. Za pravne osobe iz područja društvenih djelatnosti, uz inicijalni prijedlog za dodjelu javnog priznanja obavezno se dostavlja i izvještaj o radu za određeni period, ovisno o vrsti predloženog priznanja.

Prijedlog za dodjelu jednog od javnih priznanja dostavlja se u pismenom obliku i sadrži sljedeće:

- Obrazac za prijavu na Javni konkurs za dodjelu javnog priznanja (potpisan i ovjeren od ovlaštne osobe)
- ime, prezime i adresu kandidata, odnosno naziv i sjedište pravnih subjekata koji se predlažu za dodjelu javnog priznanja,
- oblast iz koje se predlaže,
- obrazloženje prijedloga,
- raspoloživu dokumentaciju kojom se potvrđuju navodi iz obrazloženja,
- tačno naznačeno i opisano djelo, rad i uspjeh zbog kojih se predlaže.

Uz prijedlog se prilaže potrebna odgovarajuća dokumentacija - objavljeni rad, analize, prikazi, kritike, pisanje stručnog i drugog časopisa, takmičarski rezultat i sl.

Na zahtjev Odbora predlagач je dužan naknadno dostaviti dopunske podatke i dokumentaciju čiji rok za dostavu ne smije biti veći od 7 dana.

Obrazac za prijavu na Javni konkurs za dodjelu javnog priznanja, objavljen je na web stranici Općine Goražde – www.gorazde.ba, a može se podići i u Centru za pružanje usluga građanima Općine Goražde.

Javni poziv za podnošenje prijedloga za dodjelu javnih priznanja traje **od 09.06.2016. do 23.07.2016.godine**, a prijave dostavljati na adresu: **Općina Goražde, Centar za pružanje usluga građanima, ul. M.Tita br.2, Goražde** sa naznakom „**ZA JAVNI POZIV ZA DODJELU JAVNIH PRIZNANJA OPĆINE GORAŽDE**“ – **Odboru za dodjelu javnih priznanja Općine Goražde**“.

DOSTAVLJENO:

1. "Glas Goražda",
2. JP RTV BPK Goražde,
3. WEB-site Općine Goražde,
4. Mjesne zajednice x 20,
5. Oglasna tabla Općine,
6. U dosije 2x i
7. a/a.-

NAČELNIK OPĆINE

dr.sci. Muhamed Ramović